

PARLIMEN MALAYSIA
PEMBERITAHU PERTANYAAN DEWAN RAKYAT

- PERTANYAAN** : Lisan
- DARIPADA** : Dato' Dr. Nik Mazlan bin Nik Mohamad
[Pasir Puteh]
- TARIKH** : 3 NOVEMBER 2014
- SOALAN** : minta **MENTERI PERTANIAN DAN INDUSTRI ASAS TANI** menyatakan tentang pengeluaran buah-buahan tempatan yang berlebihan pada tahun ini sehingga petani menghadapi masalah tidak dapat memasarkannya. Apakah tindakan Kerajaan untuk mengatasi lambakan buah-buahan ini yang berlaku pada setiap tahun dan adakah tindakan yang diambil dapat menyelesaikan masalah ini.
- JAWAPAN** : Oleh **YB. MENTERI PERTANIAN DAN INDUSTRI ASAS TANI**

Tuan Yang Dipertua,

Kementerian Pertanian dan Industri Asas Tani telah mengambil langkah-langkah membantu petani menghadapi masalah lambakan. Antara langkah-langkah yang diambil adalah seperti berikut :-

- (i) Membuat belian buah-buahan bermusim sebanyak 1,800MT pada tahun ini untuk dipasarkan di outlet-outlet FAMA;
- (ii) Membantu menyediakan tempat jualan seperti Gerai Buah-Buahan Segar (430 buah) dan Pasar Tani (553 buah) di seluruh negara. Petani atau kelompok tani boleh menjual terus di lokasi yang disediakan untuk memperoleh pendapatan yang lebih baik dengan harga jualan runcit berbanding jualan di ladang kepada pemborong;
- (iii) Mewujudkan pusat-pusat pengumpulan diperingkat ladang dan pusat-pusat jualan di kawasan bandar khususnya;
- (iv) Petani-petani juga boleh menggunakan pusat-pusat pemprosesan yang telah diwujudkan khususnya durian yang mempunyai akreditasi daripada kerajaan China untuk memproses durian kepada durian sejuk beku dan mengeksport ke negara China. Potensi untuk mengeksport durian ke negara tersebut amat besar dan peluang ini seharusnya digunakan petani untuk meneroka pasaran tersebut bagi mendapatkan pulangan yang lebih baik dan tidak bergantung kepada pasaran domestik sahaja;
- (v) Memperkenalkan Program Bantuan Tanam Semula Pokok Buah-buahan Terpilih. Petani diberi bantuan untuk menanam semula dengan varieti yang lebih baik dan berkualiti serta mempunyai potensi pasaran seperti “musang king” bagi durian dan “anak sekolah” bagi rambutan;
- (vi) Membimbing dan memberi khidmat nasihat menguruskan dusun dengan baik seperti menggalakkan proses pemangkasan (*pruning*) supaya senang dipetik (*harvest*);

- (vii) Menggalakkan penanaman pokok buah-buahan yang boleh diproses atau ditambah nilai seperti durian kepada pes durian atau sejuk beku; dan
- (viii) Pengusaha buah rambutan dan manggis perlu melangkah ke depan untuk memanfaatkan permintaan yang tinggi di China. Bagi membolehkan hasil tersebut dieksport ke China, petani perlu memastikan buah yang dihasilkan adalah berkualiti tinggi. Selain itu, pematuhan kepada Peraturan Penggredan, Pembungkusan dan Pelabelan serta MyGAP akan menggalakan pengeluaran hasil pertanian yang berkualiti dan berpotensi eksport.